

## Statüts

### Egualitad dals genders

Las denominaziuns da personas valan per tuots ils genders.

#### I. Böt e domicil

- Art. 01 L'«Uniun Rumantscha Rezia Bassa» ha il böt da mantegner e cultivar la lingua e la cultura rumantscha, specialmaint il chant rumantsch tradiziunal.
- El reunischa ils Rumantschs da la Svizra Orientala e promouva tuot quai chi serva a las tendenzas illa Rumantschia ed illa Bassa, in prüma lingia però i'l intschess da la Svizra Orientala.
- In special voul el approfondir la cugnuschentscha da la lingua e la cultura rumantscha da seis commembers, sustegner las lavuors da la Lia Rumantscha e d'otras uniuns cul medem böt sco eir lavurar a favur dal rumantsch i'l ambiaint tudais-ch.
- Art. 02 I'l ravuogl dall'Uniun Rumantscha Rezia Bassa giodan tuot ils idioms rumantschs ils medems drets e consideraziun eguala.
- Art. 03 In dumondas politicas e confessionalas es l'Uniun Rumantscha Rezia Bassa rumantsch absolutamaing neutrala.
- Art. 04 Seis lö da domicil es Sargans, seis intschess es la Svizra Orientala.

#### II. Commembers e lur respunsabilità finanziaria

- Art. 05 Mincha Rumantsch ed ami dal rumantsch po dvantar commember. Ils commembers nu stan in ingün grà garants cun lur facultà privata. L'Uniun Rumantscha Rezia Bassa sta garant unicamaing cun sia facultà d'affar.
- Art. 06 Areguard entradas e sortidas, recepziun ed exclusiun da commembers valan ils artichels respectivs dal Cudesch civil svizzer.

#### III. Organs

- Art. 07 Ils organs dall'Uniun Rumantscha Rezia Bassa sun:
- la radunanza dals commembers (radunanza generala)
  - la suprastanza
  - ils revisuors da quint

#### A. La radunanza generala

- Art. 08 La radunanza generala ordinaria vain convocada da la suprastanza i'l decuors dal prüm quartal da l'on. La suprastanza o ün tschinchavel dals commembers po propuner üna radunanza extraordinaria. La radunanza generala vain convocada tras ün invid personal als commembers.
- Art. 09 La radunanza generala elegia il parsura, quatter oters commembers da la suprastanza e duos revisuors da quint e deliberescha las tractandas preschantadas ad ella da la suprastanza. Tractandas d'importanza secundara pon gnir deliberadas sainza gnir avisadas ouravant. Davart la deliberaziun definitiva d'üna tractanda na previssa decida la radunanza generala.
- Art. 10 Üna jada l'on organisescha l'Uniun Rumantscha Rezia Bassa üna saira rumantscha. La suprastanza ed eventualmaing suotcumischiuns fan ils preparativs necessaris.

#### B. La suprastanza

- Art. 11 La suprastanza as cumpuona da tschinch commembers (parsura, actuar, chaschier e dus consuprastonts) ed as constituoscha svesa. Las personas elettas dessan, scha pussibel, derivar da l'intschess da differents idioms. Üna perioda d'uffizi düra trais ons e glivra definitivamaing davo quatter elecziuns.

Art. 12 La suprastanza rapreschainta l'Uniun Rumantscha Rezia Bassa, dirigia seis affars, prepara las tractandas pella radunanza generala e proveda tuot quai chi serve a seis scopo. Ella es cumpetenta surdar incumbenzas specialas a singuls commembers ed a cumischiuns elettas dad ella.

### **C. Ils revisuors da quint**

Art. 13 Ils revisuors da quint examineschan il quint annual sco eir l'administraziun da las finanzas e dan rapport a chaschun da la radunanza generala.

### **D. Cumischiuns specialas**

Art. 14 Las suotcumischiuns specialas evadan las incumbenzas surdattas ad ellas tras la suprastanza:

- dirigient dal Cor masdà rumantsch
- pagina d'internet
- preparativs per festas
- relaziuns cullas medias
- e.u.i.

### **IV. Finanzas**

Art. 15 Ils mezs finanziaus derivan:

- da las contribuziuns annualas dals commembers
- da legats e contribuziuns voluntarias
- d'entradas d'arrandschamaints specialas (Cor masdà rumantsch)

La contribuziun annuala dals commembers vain fixada minch'on da la radunanza generala. Giuvenils fin 20 ons nu pajan ingüna contribuziun, ils ulteriurs commembers pajan sainza excepziun la contribuziun annuala intera.

Art. 16 L'on da gestiun düra adüna fin als 31 december.

Art. 17 La suprastanza es cumpetenta da decretar expensas da fin 3'000 frs. l'on.

### **V. Commembers d'onur**

Art. 18 A commembers chi han prastà fich buna lavur per l'Uniun Rumantscha Rezia Bassa rumantsch d'urant 20 ons po la radunanza generala eleger sco commembers d'onur.

### **VI. Revisiun dals statüts**

Art. 19 Duos terzs dals commembers preschaints pon decider davart üna revisiun dals statüts.

### **VII. Dissoluziun dall'Uniun Rumantscha Rezia Bassa**

Art. 20 Per schogliar l'Uniun Rumantscha Rezia Bassa es necessari l'acconsentimaint da duos terzs dals commembers.

Art. 21 Ün'eventuala facultà vain surdatta a la Lia Rumantscha a Cuaira culla cundiziun da surlaschar quella ad ün'eventuala nouva instituziun rumantscha illa Svizra Orientala cun böts sumgliants. Sch'üna tala nu vain fundada infra 5 ons, dvainta la facultà proprietà da la Lia Rumantscha.

### **VIII. Disposiziun finala**

Art. 22 Ils statüts da l'Uniun Rumantscha District Sargans e cuntorn dals 30 avrigl 1966 sun gnüts revais resguardond l'extensiun da l'intschess e la müdada dal nom in «Uniun Rumantscha Rezia Bassa» ed approvats a chaschun da la radunanza generala dals 18 da marz 2018. Els aintran in vigur culla radunanza generala 2018. Revisiun da l'artichel 16 in occasiun da la radunanza generala dals 15-08-2020. Revisiun dals artichels 09 ed 11 in occasiun da la radunanza generala dals 28-08-2021.

Jenins ils 28-08-2021

Pella suprastanza dall'Uniun Rumantscha Rezia Bassa:

il parsura: Rinaldo Caduff

l' actuara: Lea Killias